

本朝分省人物考

人物考卷之五十八目錄

江西南昌府二

胡訓

萬鏜

周期雍

李元凱

熊達

傅習

龔浩

范慶

葉釗

陳奎

魏棨

查仲道

楊薰

朱燾

熊蘭

余楨

何祉

方孟縉

李金

張欽

宋景

趙惟興

李逢

魏良弼

舒芬

萬潮

熊浹

陳冠

張鏊

曾鈞

喻茂堅

丁以忠

黃樞

孫世祐

李遷

萬思謙

王希烈

姜儀

李遂

劉邦采

吳桂芳

李貴

吳晉

齊柯

雷禮

余日德

劉顯

附子挺

陳贊

補遺

張謙

范敬先

衛源

許銘

王漢

鄧以讚

涂杰

陳子貞

萬國欽

涂宗濂

劉日寧

人物考卷之五十八

本朝分省人物考卷之五十八

江西南昌府二

胡訓

胡訓字誨之南昌人生之先三日桂香滿室人咸異之既長器度端重學有師承識者知其遠到弘治辛酉舉於鄉明年登進士第授行人司行人丁外艱丙寅服闋復職奉命充楚藩祭葬使正德己巳選南京雲南道御史奉旨刷光祿寺文卷及奉勅巡鳳陽等處倉祛宿弊持風裁人服其公甲戌給由赴部時有同行者毛汝乾卒於道訓爲貸金斂之後貸金主人

沒而償其子以無券辭不受曰此實事吾豈以無券
負吾心乎乙亥陞浙江按察司僉事訓所至訪忠賢
勵名節有沈侍郎者官南京刑部素稱廉介及里居
貧甚未嘗以事干當道訓憐之歲終遺以薪米曰子
恤沈公所以愧其餘也先賢墓在屬地必修復之戊
寅湯毛九亂孝豐訓冒暑兩取兵於溫處不日平之
事聞 上嘉賜金幣庚辰陞廣東按察司副使整飭
瓊州兵備瓊去廣城三千餘里且迫近諸蠻夷訓於
是擇兵馬防要衝積芻糧行間諜綏百姓初至有以
患苦黎賊爲言者訓欲殄之而有司但議招撫訓曰

不可今之招字無異昔之和字卽下令諭以禍福有
不如令者殺無赦洞有活羅者尤稱兇黠訓譏勦其
尤者以警衆選調官軍往征之不半月賊面縛請降
認糧入籍於是生熟黎人樂歸者衆州縣村洞戶糧
田入版籍者以千百計皆海南百年來所未有者又
謂黎人之劫殺皆由土舍之科斂土舍之科斂皆由
有司之貪墨宜端本澄源則不令自清矣訓兼督學
政訓多士以行檢爲先文尙理致而下詞藻以故士
執經問難者無虛日在瓊數年視官屬爲子弟愛百
姓如家人瓊至於今慕之乙酉陞浙江左叅政公堂

宿弊一切裁革水利屯田無不區置簡易安靜休養一方丁亥陞湖廣右布政使適顯陵工興悉心綜理御史上其功加賜金幣先是楚饑訓奏發公帑二十萬一以賑濟一以補官軍俸糧米價騰貴訓獨增價致商商集而價頓輕楚雖饑不因由是撫按交薦復有金幣之賜己丑轉貴州左布政使尋陞巡撫雲南舊往滇者道由深嶺嶺中多苗獠過者多遭掠訓捕渠首梟之由是商旅夜行阿迷蒙目等州強賊流劫城邑官軍不能平訓至調兵勦捕之又麗江鹽井等變亂成法統兵越境謀虜職官互占村寨讐殺不已

訓得其故先下令曰土官犯者則子孫停襲其餘主
使幫唆則照例重究又嚴督守巡諭以朝廷恩威從
公撫勸羣夷帖然民獲以寧事聞又賜金幣己丑南
京太廟災自陳求罷未允未幾丁內艱服闋仍奉命
巡撫雲南時八寨諸蠻煽動滇民震恐訓獨督守巡
兵備率漢土官兵設法防守且撫且捕邊徼以寧是
歲修飭七陵及預建山陵勅取青綠萬計時山脉採
竭民甚苦之禱於神不數日夜半雷風大作晨視則
雷霹處皆青綠也以故得如期取盈至於欲取大理
石辦納歲例賦金奏封禁寶井銀礦而民困始蘇己

亥遇雷變及皇城災卽自陳求去俱奉溫旨諭留尋
陞南京都察院右都御史力以憲度自任旌廉逐貪
舊章畢舉嘗兼掌大理刑部事獄之寃者疑者皆獲
平反癸卯陞南京工部尚書杜請託革侵漁清匠役
省冗費民咸稱便丙午改南京叅贊機務以二品六
年考績進階資德大夫正治上卿 上念其敷歷有
年資望俱深特加太子少保訓爲兵部勤閱試慎選
任嚴關防黜影射右善祛奸畱都之人安焉守備內
臣奏請新添軍丁六十名訓不可會科道疏革訓亦
上疏其大略曰南京軍士財竭於役衆力疲於奔命

朱廷聲等二十三人又因京師地震指摘大學士焦芳劉宇附瑾首惡并申雪尚書劉大夏韓文林瀚許進都御史張敷華俱遭誣陷乞加敦禮以消天變又劾兵部尚書王敞以庸材躡本兵悉報可姚源華林馬腦劇賊胡雪兒等嘯聚據險至萬人副使周憲死之撫臣調集狼兵頻年坐守雍叅撫臣翫愒乞勒限勦殺癸酉奉勅總戎兩廣宸濠久庇總兵郭勛欲招致雍不欲約以常禮雍以不敢越分位速天刑示諷濠厲聲言曰郭總兵我朝名將不得以武弁待之雍不答至廣竟劾勛罪狀閑住又劾巡按御史不法事

并薦錄驛丞周廣俱犯時忌甲戌聞劉夫人訃歸丁
丑起復道會省例謁宸濠雍恐被禮款隨拂衣登舟
不爲所淄抵京謁執政因武廟東巡首言宗子遠遊
家相難辭其責以觸忤仍補南京河南道未抵臺以
漳寇不解構遷福建僉事飭兵汀漳知盜迫饑寒滋
於激變廼設奇間離其黨至則整衆厚陣親詣其處
以懾之察勢可諭服先一日退師一舍單騎詣賊營
諭以禍福酋長以下皆感泣就撫於是數年梗槩就
夷又以奸穴雖清防警當密奏立巡司盤詰谿峒宴
然往年苦軍餉不繼穀價騰湧乃出帑贖發有司倣

古平糴法至今米貯武平諸倉宸濠久蓄異志陽明
乃密與雍計雍謂水戰精兵惟海上諸衛號稱驍勇
可用遂巡沿海蒐閱得精兵數千整練候報比己卯
變作卽日董師兼程而進至豐城濠已就擒陽明畱
雍視南昌篆者三月辛巳起復補汴臬僉事兵備河
北道己酉陞浙江叅議分守嘉湖諸郡會溫處礦賊
周六等爲亂殺官劫庫巡按御史王璜檄雍征勦雍
先發粟賑貸結民心次行招撫許令自新然後四出
遊兵以分其衆直覆其巢遂縛渠魁以功錄廢丁亥
擢本藩叅政陞湖廣按察使庚寅陞都察院右僉都

御史巡撫應天等府有都尉恃國戚占奪小民煤窯
牽累科道府縣等官李鳳來王果等二十餘人法司
避忌奏行撫臣研問雍按法不撓勘官槩爲論復以
此受知當宁辛卯進大理寺卿值天變陳四事荷俞
旨施行壬辰丁父憂乙未起原官戊戌遷刑部右侍
郎尋轉左巳亥 聖駕南巡陞都察院右都御史掌
院事兼掌大理寺印因 聖諭點差各處巡按具奏
行在事體未便疏行各處更替御史俱候 聖駕回
京之日如常奏點詔書一欵累年充軍人犯除人命
免死竊盜三犯及嚇詐財物指稱打點者不赦外其

角原問衙門查奏定奪悉與宥免巡按福建御史某等審錄將匿名文書告言人罪及受財故縱強盜等饒死充軍一槩查奏雍言此等惡極罪大比之嚇詐指稱打點者殊爲有間豈容寬釋題奉俞旨頒示天下尋陞刑部尙書作期無軒自傲有貴幸扈從者以湖廣布政徐乾按察使吳允祿遺賂事假法文奸欲寘重典雍不可曰殺人以媚人吾弗爲也徐吳竟止免官致仕年七十三卒

李元凱

李元凱豐城人由進士知婺源縣邑故煩劇下車與

民休息興革不避勞怨奏除鎮守千戶民免暴害會
採木內臣貪虐凌有司遂棄官歸終身窮約婺人追
祀名宦祠

熊 達

熊達南昌人由進士爲溧陽令興學校毀淫祠立義
塚以絕水葬擢御史劾道士崔志薦名儒張元禎陳
獻章又納番貨築堤滕杜滹沱水患因忤逆瑾致政
值逆濠構亂以死自守卒免于患

傅 習

傅習進賢人由進士任大理評事以執法忤逆瑾謫

理問瑾怒未釋復逮詔獄勿屈後陞僉事副使兵備
屢建軍功終副都御史克定土官之亂其剛介始終
一致云

龔 浩

龔浩南昌人其妻徐與李孜省妻兄弟也孜省方寵
倖浩絕不與通聞問歷雲南知州廣夷皆若干訓改
知潞州時竹子龜山二寨猖獗浩單車入寨宣威德
諭以禍福二寨帖然夷人廟祀之休致歸疾革作浩
然歌而卒

范 慶

范慶豐城人由進士授刑部主事歷員外郎中嘗次武弁奪爵不爲權貴撓奉命勘晉藩獄情法兩盡出守蘇州禁火葬革酒艤捕檇博止游女惓惓以移風易俗爲先遷雲南憲副卒

葉釗

葉釗豐城人由進士授南京刑部主事見久繫刑部者皆制於貴戚不敢決釗悉按如法有中貴奪民田州歲利不下五百金判以歸之應詔陳八事忤逆瑾逮獄旣歸講學於嶽麓石鼓諸山尋卒諸士請配享石鼓書院

陳奎

陳奎南昌人進士知廣濟縣擢御史查盤甘肅牴牾逆瑾幾杖死巡按廣西奸賊解綬歷山西山東河南臬藩平巨寇城晉陽脩三關改汾河扈從武廟南巡權璫畏憚以廣西左轄致政當道餽以逆產咸固辭焉

魏棨

魏棨新建人由進士授行人副時逆瑾擅權棨上書言時政無所避忌出叅閩藩時古田流賊盤據議者欲屠之棨曰倡亂者馬周良也誅止周良耳賊解民

本朝夕... 卷五十一
楊
賴全活者數十萬咸肖像祀之以母喪歸行李蕭然
陞右布政致仕卒

查仲道

查仲道寧州人舉進士授兵部主事疏諫武廟南巡
被杖幾死嘉靖初錄直言擢郎中出守杭州因織造
太監暴橫民不堪命力抗阻之遂爲所誣械至京謫
運同擢知汀州府卒于官民祠祀之平生性剛介以
直道自持云

楊薰

楊薰南昌人由進士授主事劾逆瑾謫刺潮州民生

祠之歷陞四川兵備僉事以征松藩之功轉貴州有
宣慰司以金餽者正色拒之致政歸行李蕭然家居
野服途行絕無宦態王守仁大書清流臣子四字贈
之

朱 槩

朱槩豐城人由進士知吳縣改知旌德陞刑部主事
轉員外疏諫 武皇巡遊廷杖奪俸起四川僉事番
賊阿戎叛據石城討平之轉叅議時播州宣慰兄弟
爭殺僉議用兵槩獨往諭以禍福竟悅服遷河南副
使歷叅政卒于官

熊蘭

熊蘭南昌人由進士授行人擢御史豪右斂迹時逆濠蓄異謀蘭首洩其奸武廟親征至金陵聞而嘆曰真御史也官至太平知府弟葛領鄉薦爲人剛正不苟合逆濠迫脅從已窘辱百端囚禁一載幾死終不附

余楨

余楨奉新人由進士授工部主事改武庫司嘉靖初議大禮以諫獲罪而死隆慶改元贈光祿寺少卿祀鄉賢祠

何社

何社進賢人由進士授行人陞戶科給事中以諫諍著聲時江北大饑疏請發內帑蠲租稅民賴全活告養復起南兵科條陳商書一德三義軍政四事馬政五事足國裕民六事陞嘉定知府民爲立祠未竟厥施而卒所著有常濱文集

方孟縉

方孟縉武寧人早失父事母孝比沒廬墓三年由進士授刑部主事時貴戚張氏構大獄不決縉折斷平允惟理淮安漕刑值江西吳城兌運軍民交變一詢

輸服議改就省允至今民便之歷陞僉事致仕卒所著有鴈里淺稿

李金

李金豐城人登進士授碭山尹築城以防流賊後值洪水恃爲保障陞兵部郎中諫武廟南巡杖幾死陞台州知府懲奸慝弛鹽禁蠲逋負設糜拯饑民賴全活祀碭山名宦

張欽

張欽字敬之南昌人始爲舉子學以講究歸趣爲主文能達其所言而該洽羣書尤號瞻博辛酉舉于鄉

爲親謀祿以壬戌乙榜銓授岳州訓導正席講難士
駭所未聞異舍及外庠士皆相戒來就張師講舍不
能容作爲講義使傳寫轉相授其教不專爲課尤約
以禮法躬自爲率及門者多以知名擢知清遠縣清
遠最號難治至卽罷絕餽例示不可撓剔求縣蠹弊
盡得根節穴竇芟伐掃室豪胥黠吏咋舌不敢動民
有賣子輸均平錢出俸贖畀之罷其輸邑故置厰榷
鹽奸商往往匿詭規利欽受檄視榷與爲期法毫髮
不得漏羣訴臺史幾以撼欽欽不爲變商卒不得奸
售軍餉倍增興學教士獎誨有方每值倥惚其爲諸

士談經校藝輒盡所長觀者第見其暇豫是時盜起
程鄉僭擬名號衆且數萬江西福建屬邑皆被燬掠
大兵徂征俘獲日至而盜不衰都御史林庭選議非
得良令牧之相宜誅撫兵勤未已乃奏易欽程鄉清
遠人爭于督府奏下爭莫能得怨歎自失欽請督府
罷兵從吏士數輩抵賊壘賊固聞欽名不敢迫欽開
諭禍福設兩端如是則生全自保有父母妻子不則
戮死衆心動有泣者居數日賊魁鍾萬璉傳時玉饗
欽盛陳兵衛出所掠珍翫侑千金爲壽欽取珍玩碎
之而麾其金曰若等方爲農生業顧懷寶以賈罪耶

金可以買牛買田器爲衣食若等宜自懷之賊相顧
驚喜如獲賜欽笑指諸兵衛目其魁曰陳此何爲魁
與其黨伏拜曰願如公教棄刀狼籍呼聲喧谿谷爲
隔一月餘夷堡墮障籍其丁壯老幼婦女四千人散
遣之條畫使耕田築室各有寧宇邑目其民曰新民
林公得報大喜謂諸司曰興師十萬不如易張令一
符久之或有竊發發則以計縛之使得民戶不夜閉
省刑薄斂諸所綏附如清遠而誘督士者以問學尤
加意雖新民子弟多彬彬向風矣以政最拜南京刑
部主事歷員外郎中名法綜練明而能斷同官從容

容議一時以爲法欽性勁直遇事好諍剛侃不阿權
貴無所得請積有忌者遂致其官歸空囊至家或以
爲不堪慨然無愠容教一郡令二邑去皆見思尸祝
年六十有七而歿

宋景

宋景字以賢世家南昌奉新少孤奮于學弱冠爲諸
生試每居首器體凝重識者占爲公輔之器弘治辛
酉舉江西鄉薦再會試擢上第授河南睢州知州治
行卓聞改河南道監察御史是時逆瑾竊柄景慨然
引疾去家居十四年足不及城市若將終焉而物望

鬱起提學田汝籽巡撫盛應期先後疏薦起爲浙江按察僉事未踰年聞母病卽棄官歸母卒哀痛勺水不入口者五日服除陞山西副使會汾州介休饑民相聚爲盜殺地方官勢張甚撫按檄景往征之督率行伍躬冒矢石擒獲其渠魁釋降附宥脅從民賴以安青羊山賊陳卿亂景又合兵討殪之奏以潞州爲府而創立平順縣景之功爲多陞山東叅政改福建尋陞四川右布政使俱未赴改山西左使景以晉陽地瘠賦繁民多逃竄虛稅每責償平民請召人佃種而坐以輕折又定九則徵派之例以祛里胥積弊咸

著爲令轉南京元祿卿繼擢南京右副都御史總督糧儲革攬納禁糧長揭債減呈遞樣米謹通關之驗收京儲以清改左副都御史佐理院事歷陞刑部左右侍郎拜南京工部尚書時修南京奉先殿及葺邸世子府又造黃船景節費料十之七八事竣有白金文綺之賜改南京吏部旋改南京兵部叅贊機務至卽奏裁守備叅隨人役考選武職清查快船困弊精覈養馬利害戎政肅然景履行端嚴執守堅確人不敢干以私然貌恭氣和於物無忤故賢者樂之不善者亦未嘗有怨焉官雖久自奉不異布素嘉靖丙午

召爲都察院左都御史丁未卒于京師贈太子太保
吏部尚書諡莊靖

趙惟興

趙惟興南昌人由鄉舉知桐廬縣仁恕均役野宿禱
雨設飢粥濟饑民百姓尸祀之陞承天府同知出帑
以援漂沒築堤以障洋沙巨璫不敢撓其法邑有權
鹽羨金用以貸貧民之輸宦游十載寒素如故卒無
以爲殮云

李逢

李逢豐城人以進士任紹興府推官廉明人不敢干

以私擢給事有風采時大同構隙國是無從逢抗章
直憲臣劉源清之獄復疏減光祿靡費四十萬緡
世宗幸承天伏闕極諫謫尉永福轉德安知府所至
有聲卒于官

魏良弼

魏良弼新建人性資剛毅操履方嚴遊王守仁門早
聞良知之學自縣宰陟諫垣屢以讜言犯闕屢受廷
杖亦屢復職每杖患甫愈又以直言受杖下詔獄雖
獄卒亦爲之流涕而直聲滿天下隆慶初晉太常少
卿致仕弟良政中嘉靖乙酉鄉試第一良器俱受學

於王守仁門多所自得

舒芬

舒芬字國裳進賢人生而穎異不羣六歲授孝經論語等書輒了大義年十二郡守祝瀚修封洫至獻馴鴈賦大奇之薦補博士弟子督學蔡公清試輒首語人曰此天下士也中正德丁卯鄉試戊午卒業南雍嘗夜分不寐于書無所不讀而實勵志于聖學最喜濂溪嘗稱之爲中興之聖所著有太極通書繹義又作易箋問七十餘條書論二十第詩稗說三十餘條春秋疑義三十餘篇一時名士咸推讓焉丁丑考官

陸文裕深薦第一主試者抑居十一及對大廷萬言立就是科制題獨詳上自羲農以及近代凡經史所載爲治之事悉以咨焉芬敷陳道法至詳至備直言時弊諄諄懇切而卒澤于道德仁義粹如也御批第一甲第一名授官翰林院修撰時毅皇帝不時巡幸孝貞皇后崩踰月卽欲往視山陵又革一應擺路軍馬芬度其且至宣府遂上隆聖孝疏謂三年之內當深居九重無復外出雖釋服之後儼然筑筑在疚如成王免喪朝廟之時又謂自古萬乘之尊非奔竄避難未有輕身不嚴侍衛者旣而又上車服疏謂

天子等威莫大于車服而下同于庶人甚非所以辨
上下定禮儀也時虞有意外之變故每疏之中三致
意焉會江西洪水決圩漂舍遂乞恩終養謂臣係獨
子無他兄弟父母老疾恐填溝壑辭極悽愴凡五上
疏不允已卯春車駕議東巡祀岱宗歷徐揚抵南京
下蘇州復溯江浮漢登太嶽且遍中土繁麗先是江
西宸濠久蓄異謀又結陸完全寧輩爲內應士大夫
非忠義素定者輒懷疑貳以故一聞 駕出人情洶
洶皆以爲天下事不可爲矣十五日早疏先入乞畱
駕言甚激烈有曰痛哭泣血不忍爲 陛下言者江

右親王倡吳溥之計大臣懷馮道之心陸完以祿位
爲故物以朝署爲市廛以陛下爲奕棋以革除爲故
事復痛刺閣中謂一切危亡之迹不苦言以救而聽
主上之自釀時陸完以智術倖高位利于主上遠
出則已得以自恣或濠之謀幸遂則又有非望之福
故造爲惡語沮抑諫上芬乃邀考功夏良勝儀制萬
潮太常陳九川至寓舍酌之酒贊之曰匹夫不可奪
志是夕遂連疏入時號江西四君子明日諸曹諫草
相繼而進車駕遂不果出及二十日天威震怒命
舒芬等百有七人于午門外跪五日未辰而入終酉

而退嚴整無異平時二十五日戊午命舒芬等于午
門前褫衣杖三十以疏首杖特甚神色不喪惟口呼
高廟之靈冀以感動上心是日水溢內海子四五
尺衝折鐵檻大柱七若斬杖畢幾斃卧院中掌院者
懼禍至使人標出之屹不爲動曰吾官于此當死于
此又命爲首者調外任遂謫福建市舶副提舉卽裹
病就道或勸俟痊曰死吾分也敢少畱耶是時死而
復蘇遠近相傳爲自羅一峯之後見先生語蓋羅一
峯劾大臣遭喪起復亦謫此官云旣至閩布德宣威
遠夷心服暇則講學不倦生徒日衆六月丙子江西

宸濠果反敗庚辰閏八月聞外艱兼程而歸歸則哀
毀骨立辛巳夏 世宗卽位肆赦諸竄謫者癸未服
闕應詔復官翰林道濟入謁先師行釋菜禮因錄所
撰謁闕里記所畫闕里圖所貌夫子宮墻圖所行釋
菜禮儀及士相見禮儀并問答五章聯句三十五韻
總題曰東觀錄時吏部依詔書例陞俸一級上辭陞
俸級疏奏請勅命遂得貶恩降勅褒之甲申春二月
昭聖慈壽皇太后聖旦節上乞命命婦朝賀疏謂
皇太后奉 陛下宗社大計而 陛下承繼大統觀
夫成王周公儀禮經文與我 太祖制服之意則是

陛下于 皇太后雖欲疏之有不能者是宜率天下
懽心以事其親而不可使 皇太后之淒涼也三月
乞致仕以圖便養疏再上不允洎夏又再上不允又
乞改選以便養又不允時 世宗欲尊興獻王爲皇
帝爲皇考命下羣臣議大禮芬執議謂爲人後者爲
之子不得顧私親疏凡三上固爭不得乃率朝紳慟
哭于廟 皇帝震怒杖如前幾死罰俸三月時奉太
安人壽氏就養明年乙酉太安人卒于京扶柩南還
行李蕭然抵家三月而葬生平酷好周禮詳加訂正
作五官序辨五卷六官圖釋一卷剔僞二卷旣乃校

定正經仍六卷總之十有三卷題曰周禮定本謂周禮者至誠盡性之書也漢儒多附會之罪宋儒乏表章之功又嘗修三禮書未就而辭世矣幼穎拔日記數千言貫穿經史百家于天文尤精觀望星氣有占必應雖同館號知天文如黃公佐者亦自以爲不及也又言鐘律度量所以治曆明時康節相得大意而不能建律運曆將舉禮樂必也周公觀大司樂則律曆備矣識者韙之嘗語同館友曰心術與學術相苻者也懷居與懷利相因者也怠勝敬欲勝義則其心死其學僞吾儕格君其豫在此通籍十年義氣激烈

諫而杖杖而竄又復諫又復杖絕無一毫得失死生之念幼以聖賢自期嘗悼異學之謬曰空言無補不若修其本以勝之因取周子學聖有要數語書之座右緇流羽客悉毅然絕之至于權倖奄宦有求通者拒之甚力扶母喪入江忽雲垂波立危甚乃爲文籲祭風濤頓息與朋友相劇切無幾微矯飾尤善成就後學嘗語之曰士當爵祿不入于心溝壑不忘于念歿之前日門生譔柝夢垂白簾中有六字曰忠孝狀元止此歿之夕大風雷電伐木爲巢覆屋瓦飛其關係有如此者病中矩度毫髮不踰臨終沐浴與衆揖

別長子泣問家事不答跪請所欲乃瞪目謂曰六經大明于世惟周禮未獲表章余生平精力盡在此書第未及進御爲歎耳言畢而逝海內士以芬與羅一峯並稱云

萬潮

萬潮字汝信進賢人辛未魁禮闈始推官寧國擢禮部儀制主事武廟南巡抗疏止輦杖瀕死楊邃菴賦詩謂江西四君子世宗詔復職推浙江提學僉事巡按潘薦之有學觀聖賢之奧才兼儒吏之全等語累官至延綏巡撫右副都御史嘉靖壬寅言官論

邊事潮亦以風土弗宜疏調行至宜君縣疾卒年五十六

熊 浹

熊浹字悅之號北原南昌人幼質穎敏博學尤精於易爲文詞清勁以儒士舉正德丁卯鄉試甲戌第進士拜禮科給事中持議審諤一時權姦沮懾已卯宸濠以南昌叛初濠之異圖也錮浹及御史熊蘭至親爲質又陰結朝貴阻絕封事巡撫孫忠烈疏七上不達浹曰伐謀貴豫否則羽翼已就難圖矣一日偕蘭密授草御史蕭淮上之濠大懼洩露遂發兵反不再

月果擒有儉人者因導 武廟南狩浹倡朝臣累日
伏諫不已奉命查核松藩邊餉總兵某者怙勢侵冒
動以萬計浹廉實狀聞寘之法壬午詔討求追崇典
禮朝論準治平間安懿故事浹在蜀聞之抗疏論今
上承統御天弗緣所後而禮濮國不得考於宋英今
獻皇豈濮國比哉反覆以倫理天性辯之遂牴牾出
補河南右叅議至則起瘵招逋弭訟時部境寇作浹
曰安得以職守分彼此耶卽勒兵捕之會外艱歸丁
亥召修明倫大典浹乞終制次年大獄明擢都察院
右僉都御史偕嘉魚李公講求振刷臺憲一新明年

陞右副都御史大典成轉左副又明年轉右都御史
掌院事七閱月有人命獄成於奏緝羅織者勅下法
司會鞫衆依違獨奮筆曰殺人以媚人弗爲也力白
其枉旣重忤中貴而忌者因擠之遂罷免己亥駕謁
山陵御行殿召近侍追論舊臣上曰浹老成諭吏
部起用尋陞南京禮部尙書句曲人王某者疏欲表
揚朱家巷以崇國姓浹曰天親不可以人爲今日久
跡湮涉牽合非禮也遂寢其議廷論躉之庚子改南
京兵部尙書叅贊機務考核軍政去畱當材品人服
其公又奏減龍江淺船餘丁幫甲若干以甦困卒又

禁和買罷諸苛法畱軍民倚重焉癸卯召爲兵部尙
書兼右都御史掌院事慎差遣無遠近勞逸一揆於
才力曰紀綱之地將以糾正官邪而先自枉可乎衆
志遂定有巡關者適警報托疾自逸浹遣首領促之
竟無敢逾宿按歷有擅威福甚者必貽書令省改嘗
辯官民冤牘剖成案未嘗徇勢屬甲辰改吏部尙書
浹曰太宰天下所與取平者吾安敢臆決耶凡陞敘
無小大流品日與少宰安福王公華亭徐公及司屬
之賢者共焉每每注選必語所司曰此缺相宜否如
否雖十易之何害尤獎救寒峻惟恐其墮落臺官自

嘉靖初漸廣舉刺浹曰非制也其病有司炫威市恩不免矣請凡中差論列苟非其專職無濫及遂著爲令在部院京察二外察一皆蒞以公嚴京察惟黜其行誼尤無良者有直道被誣者必辯救之凡遇姦人傾陷善類皆昌言正色諍而全之衆皆悚服宰銓逾月 上優以弼臣之遇乙巳滿考六年加太子太保八月疏斥箕仙之妄忤旨惶恐待罪至十二月固乞休遂遣官校械繫以歸執氓役在田凡十年足跡不入城府每見邸報知時事災異輒憂形於色尤以未報國恩爲恨每厭術數之學好觀程朱語錄求體驗

以是臨大政決大疑確有原本蓋以抗直任事以惠利救時識其大矣歿於甲寅享年七十有七

陳冠

陳冠南昌人由進士授工部主事歷陞營繕郎中親覈中貴役占冒濫諸弊淹郎署十五年不遷忤時相謫官家居不事豐殖一榻數十年無有御之者郡士大夫共高之

張鏊

張鏊南昌人嘉靖丙戌進士簡庶吉士陟部郎悉毀寶玉佛像力拒徽藩田租督浙學政得人最盛以祀

辭忤時相改遼罔卿轉藩臬至南京兵部尚書相度
留都險要分水陸兵首尾聯絡俾江南北免倭寇荼
毒皆整力也整外直內清儒雅爲世所重

曾鈞

曾鈞進賢人由進士授行人累官南京刑部侍郎中
外垂三十年所至遺愛遐思遠邇若一居南垣以蹇
諤稱歷藩臬中丞卿貳以勁節著且抗疏歸田其介
如石奇氣峻節海宇仰之卒贈刑部尚書謚恭肅

喻茂堅

喻茂堅豐城人領四川鄉薦登進士第授銅陵知縣

治行卓異擢御史恒守正忤時後守兩郡踐藩臬轉
右副都御史大理卿刑部侍郎首尚書歷事兩朝屢
批逆鱗履虎尾旣全其道又全其身且筮仕宦成清
苦一節以尚書致仕囊無餘金自奉簡約若儒生然
隆慶改元贈太子少保諭祭葬子姓秩秩約可百人
科第接武遂爲豐城宦族云

丁以忠

丁以忠新建人由進士授刑部主事諸疑難大獄多
所裁決出爲河間知府發粟賑饑却賄明法歷閩廣
藩臬所在尸祀巡撫山東汰冗兵簡浮食晉南京兵

部侍郎定噪卒之變既考績鄉貴當國感時事遂懇
疏致仕歸卒祀鄉賢所著有世美堂稿

黃樞

黃樞南昌人由進士授縣尹陟南刑曹累轉至太守
居官清慎自持興利剔蠹勞怨不避知嘉興賑饑有
方守湖州禱雨立澍特疏請蠲民受其惠竟以勞心
民瘼卒于官當永訣時有勢家餽貽棺衾奮起手麾
之廉介至死不變沒祀湖州名宦本郡鄉賢

孫世祐

孫世祐豐城人由進士授行人歷員外僉憲藩叅至

都御史巡撫雲南先是土官豪恣禍變相踵世祐約
黔徒緝奸猾諸難悉平陞工部侍郎修葺城堞時倭
夷江寇起卒恃以無恐召拜刑部尙書致仕卒世稱
長者云

李遷

李遷字子升新建人登進士以行人出使滇蜀貴竹
堅却餽贖除南京兵部主事按侵犯三皇陵獄不徇
權貴全活數百人出知濟南府疑獄多所平反歷楚
蜀西粵藩臬辨雪冤獄開諭藩王巡撫直定援兵破
虜總督兩廣悉勦諸蠻蕩平三世劇寇功尤偉焉以

南京刑部尙書歸老卒祀鄉賢祠所著有鶯谷山房集

萬思謙

萬思謙南昌人由進士授吳江丞轉嘉定尹備禦倭寇築城堞淹滯郎署轉光祿丞以長揖冢宰外補官至福建左布政使家徒壁立陞南京太常寺卿致書張江陵勸復言官切直相忤遂致政歸篋無遺帛清節天成士論歸之

王希烈

王希烈南昌人幼穎異七歲有敲落梅花襯筆香之

句人咸奇之由進士選翰林院庶吉士授編脩歷官
春坊國子祭酒吏禮工部侍郎兼侍講學士掌詹事
府事充經筵日講與纂脩副總裁希烈粹中休度內
直外和居常以名節自持立朝三十餘年未嘗私謁
政府侍經筵日講每引經寓規諷忠悃溢然嘗攝禮
部尚書事會肅王薨無嗣中尉某陰援爲代希烈正
色不許甲戌典會試張江陵以子希進則矢日不私
士論服之屢與鄉會試門生例獻贄悉峻絕之居父
喪哀毀服闋以原官召用而烈竟以毀瘁卒贈禮部
尚書諭祭葬祀鄉賢

姜儀

姜儀南昌人由進士初任鳳陽抗疏逆權闔蕩平湖
寇懾服貴宣慰安族鎮建寧諸路荒全活億萬人征
楚苗蠻不妄殺一人復地四十五營寨疏忤時相謫
官致仕平生剛介敦孝弟讀書危坐終日祀楚辰名
宦本郡鄉賢

李遂

李遂豐城人丰姿魁偉博學有才諳尤長于用兵沉
機秘計往往出人意表列秩祠部出歷郡牧藩臬晉
貳畱憲終南兵部尚書初南京振武營兵變賴遂指

揮鎮定之嗣事者控制失宜諸叛卒益驚悍無狀幾於決裂比遂典留樞卽寂然就羈縻中蓋其戡定之略如此

劉邦采

劉邦采字君亮號師泉南昌人初爲邑諸生卽厭舉子業銳然以希聖爲志曰學在求諸心科舉非吾事也趨越中謁陽明王稱弟子王與語稱之曰君亮會得容易其賦資旣穎敏而行益卓峻丁外艱蔬水廬墓哀誠篤至服闋不復應試而士論益歸嘉靖七年秋當鄉試督學憲使趙公淵檄下邑曰劉某行修義

端宜勸起赴試邑令勸之出不可而趙公責邑令益
急固強之出官爲具舟屬丞偕之行至南昌采欲以
布衣往見丞降禮卑詞請具衣巾曰不爾憲使且罪
我乃不得已具衣巾往及門遙望趙公未下席卻步
不進趙公亟起延之采以棘闈故事令諸生脫巾露
體而入非待士禮某不願入也於是巡按御史儲良
材令十三郡諸生竝得以常服入闈免其檢察比揭
榜采得中式儲公批其卷曰江右人望已乃授壽寧
教諭以正學廸士多所興起以薦陞嘉興府同知尋
棄官歸自陽明倡道東南學者承襲口吻浸失其真

采有憂之乃極言痛斥以揣摩爲妙悟恣縱爲樂地
情愛爲仁體因循爲自然混同爲歸一者之非以心
之體曰主宰貴知止以造於惟一心之用曰流行貴
見過以極於惟精是謂博約並進敬義不孤性命兼
修之學如車輪鳥翼不可偏廢後學能領會者蓋鮮
晚乃著易蘊二篇詞旨淵奧實發其所自得將以俟
諸百世云思苦而造微諸生叩請能以一語開其宿
錮令人豁然有省聶貞襄嘗言師泉力大而說辯排
闥之嚴四座咸屈人皆避席而讓舍莫敢有撓其鋒
人以爲善狀云比屬疾知不可起諸生環榻前猶論

學不輟疾亟門人朱調問之曰此際視平時何如答
曰夫形豈累性哉今吾不動者自若也第形如槁木
耳少頃遂卒當其疾時若有所遇頗涉奇秘而不言
及將殮體更溫久之乃已亦其養盛而氣完之一驗
也年八十有六

吳桂芳

吳桂芳號自湖新建人九歲卽善屬文十三補弟子
員弱冠舉癸卯鄉試第二人明年第進士授刑部主
事明年吏部尙書聞題請移各部才主事居言官刑
部則列於首而移檄之夕以聞潘淑人訃不果舒淑

人舉芳卽歿而潘繼室乃愛篤至凡爲諸生以及仕
衣食非潘手親則不以畀而顧已所生都事君與二
女愛皆不敢望以故芳於潘忘其非已出聞訃哀毀
感動行路人謂母子兩皆絕世間不常覩也服闋補
禮部主事轉祠祭郎中是時分宜秉政子世蕃橫甚
然欲媾婚名士以自塗飾聞芳有女一日親造請曰
願以子託館甥芳恐其膩乃佯驚曰某止一女與朱
給事應辰子負盛意柰何世蕃大阻後一月世蕃偵
知之乃悟前語爲漫恨刺骨倭寇方熾而維揚爲盜
藪且衝劇欲因以困之乃抑其資令出守抵揚甫數

日而壽藩宮眷取還邸中官私驛騷官吏走匿芳卽
走真州境上逆之好爲之禮而震以威凡揚境內數
驛舟夫之資皆一時并給中使望芳貌偉岸固憚斂
而又先事備不以乏觸怒乃戢戢出揚境不泊岸民
帖然不驚而名亦由此起時倭寇猖熾流劫通泰建
白創選旁海竈戶爲兵使守其地賊登岸見之駭走
因追逐殺數百人賊不敢復入揚境乃請經畫城如
臯城泰州城海門城瓜州又城郡城外垣詘財聚力
悉指授調度民不知病揚號財賦區尤潔已無所緇
有火署丞者黃商者皆爲人誣陷竟直其枉乃皆外

假書米內裝重餽千餘金竣却之且置於法其後遷
行徐生以仇家陷其通倭家且破廉其誣亦直之而
生自携千餘金致於半途芳曰吾行而受卽在郡何
如不速去則且視黃商火丞例生愧懷金去還家以
像事滿考遷臨清兵備副使未幾改山東督學轉廣
東叅政浙江按察使左右布政使時胡督撫以兵事
泰於用財慮不給芳爲查理積年隱沒者幾月得十
餘萬緡胡於座起揖謝曰公真天人也時望重中外
方欲倚用而分宜銜不置閩撫臣以戰敗於寇罷去
乃曰非吳公不可代意實欲申前恨困芳命下而丁

父憂嚴愕眙曰有福人未可量服闋起鄖陽巡撫尋
晉副都御史總河道未任轉兵部右侍郎總督兩廣
潮州柘林官兵喇撻大總管者以少糧脫巾呼其黨
數百人一夕叛時與倭持兵尙未解也密以計授其
將且聞東莞有李茂材者頗以鄉兵雄於里召而密
約厚以賞使其隨官軍尾擊之海上皆悉擒斬方叛
兵環海轉掠省城非芳星馳還鎮則城外民居廛貨
俱爲盜資是功旣奏而始決意城省外城矣版築甫
畢遷去而閩之流寇曾一本突入犯省城曾老於賊
部下梟雄數千人意固垂涎濱河居民財富將甘心

焉不謂有城也。比泊而樓櫓森整，殊失計去。遂就擒。于是人知芳有保障功，爭立祠祀之。召入以原官佐部議正卿。缺芳署部事，疾作，累疏乞休，還家八年。與同志聚講山中，足跡不謁臺省。是時嚴氏方敗，與之連姻者皆爲輸贓，有死於獄者，而門庭宴然。人始識芳初拒之有以也。漕計方艱，阻朝廷特以原官召入抵任，卽疏開草灣以通海口，築高郵堤以蓄湖波，則運路不梗。天子覩奏，俞行之。績且奏，而兩都言官以爲河流尙漫，淮揚爲巨浸，河臣與漕不相統，非大更革設總督不足以集事。於是天子晉工尚書總督。

河漕事而芳亦以屬新釐建百緒注措早夜草奏移
官定計而往疾頓作命下幾月卒年五十八 天子
痛悼加贈太子少保平生敦大倫尤好賙人急兩姊
妹與弟都事君俱異母給贍周洽於都事君均分半
產以廕移之幼時師戴博士士元老且貧養之終身
杉林居族地卑而屋敝捐已財爲改創爽塏聚族以
安焉鄉之戚里待而舉火者不啻十餘家也嗟夫人
生不樹勳名學行名世而徒以富貴相推挽者如燭
火電光其謂何哉

李 貴

李貴字廷良豐城人年十五入郡庠嘉靖壬子舉鄉
試第一登癸丑進士選入翰林讀祕書乙卯授編修
戊午滿考己未丁母憂歸癸亥復官翰林丁卯隆慶
改元出爲四川按察司副使幼穎敏書過目成誦初
下筆爲詩文卽軼老成者出其上稍長潛心性命之
學嘗讀論語所謂叅前倚衡者躍然有悟卽日務靜
養非禮不行及在祕館卽編集古名臣相業日自省
覽慨然欲身任天下之重旣入史局益講求天下治
理自鍾律刑賦兵車陣法靡不綜覈著爲圖論己未
乙丑兩校南宮士有爲郡縣者手編濂溪明道橫渠

紫陽象山五先生政績授之曰治民當法此無愛民
之實心者治終不古若也蓋志甚大材甚高未少出
其端緒爲忌者所構失當路意歸未二年以乙亥九
月十八日卒年五十五所著讀經史雜記若干卷豐
乘思齊錄及五先生政績實語呂光洵曰方癸丑將
選館時李西野宗伯欲彞予謁嚴相公予謝不往亦
竟以入館命固非人所能尼使也嚴於先賢爲同鄉
且不肯一往謁及嚴旣去國時忤嚴者悉被顯擢而
貴又獨自免歸光洵自南宮爲貢所識拔入翰林貴
戒之曰官于此有三隆文聲以起世譽上也勤趨承

以愜時好次也下乃守廉恥待歲月耳雖然爾必爲
其下者

吳晉

吳晉字三接豐城人嘉靖間太學生倅惠州五載絕
苞苴清壅牘而督礦榷鹽纖毫不染郡治密邇軍衛
前此屬兵督屯如匪其人則專事敲朴以延歲月其
逋負千萬至有皓首羈縻莫能輸納者晉承當道督
徵之命推度利便簡易通融量其遠近本折隨宜逋
負者十完八九輸納者不逾日上旣不失國用軍需
下復不浚兵民膏血軍民咸德之歲丁未秩滿自錄

事擢主簿當國總宮宋者夏少師夏以嬖妾育於蘇
綱者册爲夫人援引聯衿日銑者開河套農於邊圉
綱視二婿爲囊橐而艾侍御朴則巡視太倉出入其
門通利孔晉嘗詣夏夏出所製漁家傲掀髯得意謂
河套指日可復邀和之晉詞有千金不數陳平計蓋
諷其貪也夏大詬怒將以晉往解吏皂皆言晉雖同
鄉與夏不相往來是時守正不阿大異於人矣比夏
嗾晉去去之三日而朴與綱坐黃正大事納倉通賄
下獄皆謫戍窮荒居無何銑與夏又皆坐邊釁姦黨
前後棄市而同鄉依附有卒於震駭者晉以滿考得

擢上林苑監左丞天下國家之大計敗於貪而成於廉曾謂柄臣所見不逮晉耶

齊柯

齊柯字文則號恒省南昌人生而穎慧兒時瞻視端凝屹如鉅人而受氣甚薄體僂弱若不勝衣獨沈酣枕藉于經史之間沛而為文若走建瓴之水而決江導河也十八補郡庠弟子在庠序用禮讓相先遇齒長于已即道路一揖之頃務為折節曰此我丈人行也遇同儕進退先後不少踰尺寸御史羅雨巖者柯先輩也柯方弱冠試場屋而羅公尚處棘院外明日

羅公歸柯爲執蓋提襪被送郭門殷勤爲別而諸暫
得意之徒氣益一時視羅公蔑如也未幾上元許公
視學南昌閱柯文特冠其曹偶而士論共推柯年少
謙讓可風薄俗受上賞乙卯舉鄉計偕而北會分宜
當國特慕柯厚幣延致訓世藩諸子而分宜諸用事
家人嚴亮嚴鵠一時狐假鴟張來往縉紳間諸貴人
畏口語者反暗憚之及見柯固詭爲恭謹柯自是坐
閉深院外事盡謝不聞日斤斤引繩墨化誨諸子攻
文讀書至莫能窺其半面柯亦尋厭別去分宜敗株
連遍天下而柯得奉完節清名舉世高焉七上春官

授和州學博務先道德禮讓而次及文稅復倡講學之會風聞遠近學士大夫不憚百里造柯印可各俾有所得而去州守李渭屬柯修和志于山川風俗田疇戶口之外孜孜傳廉吏紀鄉賢端人正士節婦烈女三致意焉陞温州瑞安令邑故無公費而有沙稅名公費歲人不下千金悉罷之自是疲民少蘇邑中田賦輕重難平或田廣縮稅狹而反溢稅者歲屬丞尉徵收民益苦之爲建丈量之議請監司郡守親爲履畝握算登籍以記無有漏而以田額之美餘實田額之不足供應諸費悉取俸祿自是創爲畫一官無

擾民民無逋賦未幾新例下大丈天下各田獨從容
按故籍對居五年以卓異名入都下主長安門民家
出入隨一蒼頭囊中有時或不能貯一錢至一切請
謁問遺柯實不省何等擢評事大理出守臨安在滇
南萬里例得乘傳往至臨安日坐堂平政簡訟兢兢
自己俸外絲毫之間恐少污指既致仕去屬有遠土
官者德柯又度柯歸貧中途齋重金爲壽立麾去柰
何以此相挽歸而白袍青巾逍遙里門之下念無所
事獨有所乘車鬻之不可焚之無謂卒推而贈其女
夫當塗令之子敝廬薄田悉守舊物其逝也幾無以

爲斂在仕宦寧爲廣州過矯廉之處默在學問至爲
鵝湖不立高論之伯恭長貧庶幾于黔婁而貴稱二
千石直道無忝于柳下而仕免于三黜者歟

雷 禮

雷禮豐城人在兒時能脫水火不死弱冠舉于鄉繼
成進士授興化司理有林子成利其兄子益夫產乘
兄子妻待其弟寡恩乃匿其弟而告其兄爲殺弟御
史屬禮勘之其家則叢聚人比屋而居曰是何能殺
人昇尸焉往乎詰子成子知鬻諸潮州禮遂生致之
益夫得釋尋以制歸復補寧國司理涇有豪曰吳榮

四與華六格而華六死矣乃急捶殺其僕昇于華六所以爲償而華六甦吳更愬華死其僕而華六論抵死禮勘之曰否華六與主格胡不格其主乃格其僕必吳懼華六死而死僕爲死對華六生遂反誣之耳待鞫者曰豈神乎諸發人隱微類是以異等入銓曹時有求補是官者太宰公言曰非雷君不可服人乃竟補禮後司考察汰權勢暱者十四人陶仲文以符籙取媚歷官少保考九年滿引大臣例自陳禮奏真人仰荷聖恩效勞至引奏不曰奉職而曰效勞一時咸以爲得大體相嚴與陶比啣之而夏文愍亦欲黜

仙居應禮禮抗曰是無公論矣必欲盡絀才賢而後快吾不願也遂出禮大名通判未幾以憲副督兩浙學政獨持衡鑑不爽毫髮人亦無敢于以私者學政爲之一新俄陞南太僕少卿是時逆鸞請北伐需馬急而禮尙未蒞任事亟矣先期辦馳至得緩急用大司馬趙公訝曰何迅霍若此尋轉太常卿推尹順天順天當輦下政多束縛不得便又內外厥府鋪行召種蠅聚毛錯禮一切繩糾以法務以利民陞工部侍郎是時營天壽山計費且不貲禮疏議節省受事卽夙夜在公上遣中貴人偵視知狀乃嘉嘆久之受

知始此比三殿工興分宜父子欲以屬他親昵者不
得已方以禮晉部事司營造已遂條上八事而將作
大匠徐昊得爲卿有心計與之易磚石爲須彌座積
才爲柱省不可計卽巨璫黃錦見以爲天生若人爲
國家用而璫袁亨於 上前輒言未備禮疏請吉立
木賴 上聖明知璫輩欲中之一惟禮言是信工成
而推恩及歐陽司空朱緹騎乃禮止尙書添註分宜
父子阻之也然三殿之工估者至數十百萬而費止
什一萬壽宮災估者復以三百萬報當事者難之時
徐文貞爲夾輔問禮幾何禮曰二十萬足矣卽以聞

上喜而分宜不懌禮念 上諭且諄切朝夕匪懈祁

寒雨雪至躡油履行泥中執蓋自障卽元夜不休上

知嘆異撤御饌勞之又念其孤劬須以人輔而華亭

子璿司繕造分宜孫紹庭司巡緝分宜以其孫何不

能繕造而必令棄之巡緝會內監復言無所需激

上怒禮力請 上閱閱竟 上喜甚稱禮爲良臣有

銀鏹飛魚之錫分宜益不懌然 上意固倦倦知禮

之體國而分宜之前後嫉禮狀亦灼然矣至是歷一

品三年考 上援故事賜羊酒鈔錠授柱國加少保

紫宸宮再建禮議宮禁重地不便出入請遴內使廉

慎者專稽驗而禮得一意督促紫宸成加少傅謝辭
上曰督掌工務節財任怨知深矣無何世廟賓天
禮臨毀甚穆考登極禮舉前此之加派費稱冗者一
切罷之天下以爲更生而一二少年始媚分宜及敗
而排之天下不直其人必欲甘心于禮疏入上曰
雷尚書功在社稷柰何劾之一時咸謂聖明天子而
禮更振厲部事上幸成均禮與徐文貞東坐聽講甚
重適吳給事時來上封事言內使不法上震怒禮
因便言前杖石今復杖吳恐累聖德遂得免會中涓
言內教場禮疏謂皇上尊居九重必導迎和氣凝

神淵默不宜躁動震驚事遂寢御史李志學奏裁中
官號房內使羣歐御史于朝禮正色奮前曰此何所
御史何官爾輩攘臂辱之無君甚矣衆始解散尋疏
謂工部與內府相關今內璫怙勢行私臣每事掣肘
願乞罷歸奉旨准致仕前後所言事輒於宦寺不便
而若輩傾之力必去而後已省臺交章請畱携一僕
一敝篋翩然往矣歸杜門謝客著書如大政紀內閣
行實列卿年表鐔墟摘稿行世家居十三年辛巳疾
作語徐夫人曰夢夏文靜公邀游南岳遂卒訃聞
上輟朝贈太保賜祭營葬

余曰德

余曰德故名應舉後以成進士爲其不雅而更今名
字德甫別號午渠豫章人初授刑部貴州司主事於
法亡所刻縱尙書稱之與歷下李于鱗吳郡王元美
相劘琢爲古文辭長身疎瘦眉目清朗不多飲酒雅
談笑然簡遠有準時楊忠愍繼盛以直言相嚴罪下
獄論死嚴之鄉人皆掩耳不欲聞楊公名乃時時訊
問亡所避遷亡何以四川司郎中出讞浙江諸郡刑
獄浙俗獷巧善麗辟深文吏往往以鷲擊羅織其得
出者咸自慶慰恨見余公晚大司寇亦亡所駁異還

理其司未幾擢福建按察副使至閩值宗子相理學
政而徐子與守汀喜甚詩筒還往不絕俄而子相病
且死矣躬爲視含斂傷其無子使其子裴經而受吊
以其喪歸入賀 萬壽還任屢有平賊功竟爲忌者
罷出入中外十餘年未嘗一日廢詩而至是乃益刻
勵自于鱗而上以至于古之作者亡所不究極于鱗
慎許可其遺書于人曰大江以西余生一人而已而
豫章里中人鮮治詩亦不聞古調嘿嘿不自得所著
詩僅見錄本一帙然已嘗鼎一臠矣

劉顯

劉顯南昌人嘉靖三十六年夏四月倭奴寇揚及淮
殘啄州縣十有三殺都指揮一所過鞠市爲墟暴骨
如莽我國孔棘留京戒嚴時劉將軍方北下將祗役
金山大司馬張檄將軍守浦口無何白司馬曰賊性
貪恠輸掠旣衆其欲已盈必無南今去者半其在泗
州者需亦去耳不如擊之顯留此不能自效也大司
馬許之會御史馬移書辟將軍將軍乘傳謁御史御
史喜命具饗饗將軍將軍曰賊在顯不咽食也請爲
君滅賊還饗耳五月乙卯與其家甲驅至安東謀之
賊艘二十九賊衆時脅從散去簡人人倭也遺將軍

謾書將軍笑曰賊素易我且歸則志惰可斃而待也
廼伏甲岡下躬率四騎薄賊艘詬之賊出將軍叱三
騎使前以身殿斬一人以徇且戰且却射馬中矢馬
駭將軍下馬扶簇賊卒馳將軍前將軍躍馬斬馳者
賊至岡下弩發賊多中弩者然且扶傷而鬪甲亦殊
死戰賊乃引去甲欲逐之將軍曰日旰矣勿逐也賊
言焚民廬以摧我將軍卽先自焚賊縱所俘美女子
以蠱我將軍戒毋犯悉縛送有司將軍度夜當雨謂
甲曰我露宿是彼以逸待我也乃違岡十五里而軍
選人持火器潛涉賊艘賊數驚徹夜不得寢厥明丙

辰援桴誓衆將軍執一幟以號于衆曰汝官軍有能
敢勇殺賊樹功勳者立此幟下得三百人曰我前拒
汝爲後勁命甲四十人塞隘巷之衝每巷以五人守
以五人巡曰賊出汝踣命甲六十人分四部伏岡下
曰賊潰汝擊命三巨艦積葦泊上流曰賊艘汝燔右
之虛營以張其勢左之疑兵以分其黨復令數人升
屋而譟曰獲賊矣獲賊矣旣誓乃陣賊自巷出者連
斬四五人遂不敢復出退語其魁魁怒摘冠揮袵左
手持刀右手持扇登岸麾賊衆蟻轉矢集如雨將軍
單騎遇之格者半掇者半矢盡又張其銳圍將軍數

圍弗克將軍射賊輒殪賊氣稍奪將軍曰彼衆我寡
不先礫其魁則衆不携也迺一呼突賊壘斬前隊二
人直擣鼓下斫指麾者自頂至踵裂其尸出賊陣後
賊衆披靡相怖以目甲四起夾擊之斬獲甚衆賊大
潰還奔舟舟焚將軍追至舟上盡斬之又擒一魁名
五大王者亦斬之溺水死者不可殫計淮倭悉平將
軍不胄不介着一白布單衣巾褲亦如之身不滿七
尺猶夫眇小丈夫耳及遇敵提兩刀騰躍超踊矯捷
若飛刀起見刀不見將軍淮民自河上觀者咸咄咄
曰神人嘗平九流橫江白草松盤芒佈等洞以三百

騎破獠萬人孤身被圍轉戰三日夜斬獠繫馬首潰
圍而出守蜀十年身經百戰不一衄性闊疏無世俗
脂韋態以是多不悅于人云子挺襲父職歷官都督
府同知掛平遼將軍印總兵官挺少負大志勇常冠
軍征播征倭屢樹奇績會奴酋犯順 詔起于家挺
疏言計定而復戰而當事者迫之出關提孤軍深入
虜巢援兵不繼與其子俱戰歿于陣事聞舉朝慟傷
凡孤卿九列共爲文立壇祭之詔贈少保立廟祠祀

陳贊

陳贊南昌人隆慶辛未進士知南海縣悃愾無華愛

民如子聽訟決獄一以寬和不爲嚴厲刻覈之政民
共歸之待士忠厚有禮所簡拔多豪雋征輸攢造俱
力洗宿蠹庭中皜然萬曆甲戌倭警驟至奉督撫檄
單車巡行查點保甲安靖不擾鄉民至今猶有以其
所止比甘棠者政成擢刑部主事後遷雷州太守卒
于官

補遺

張謙

張謙字道彥江西南昌縣人洪武三年以文學除浙
江道御史尋辭歸十七年因薦入朝講周易稱旨陞

刑部右侍郎復改山西道御史卒

范敬先

范敬先字伯寅江西新建縣人洪武初進士除御史嘗指陳闕失過切上怒磔之市磔者已批其兩乳敬先曰姑止吾有詩獻詩云劇人呵叱廟廊器 聖主磨礪梁棟材 上亟命釋之後謫趙府卒

衛源

衛源江西南昌縣人永樂四年進士除湖廣道御史賑濟饑民全活者衆三年入爲刑部尚書

許銘

許銘江西南昌人永樂四年進士宣德初爲浙江按察司副使持憲嚴明豪貴人不敢干以私而興利除害民皆感服嘗上言備邊禦戎國家重事理兵足食備禦大經近來邊軍困於雜役多致逃亡防守旣疎屯種亦鮮若悉矜免專令備邊如舊給與俸糧其有餘力各遣屯田則食足兵強守固戰勝矣又言夷狄獸心難以德服其曰歸誠朝貢實皆慕利而來爵賞雖加反側難保宜加樽節防閑如 祖訓條章許其來朝者或三年五年一至其餘悉宜禁止則送往迎來免困民力府庫之財不至妄費矣上嘉納之

王漢

王漢進賢人景泰五年進士選授南道御史建言謫
衡山知縣召復原職巡按廣東浙江陞陝西副使本
省按察使累陞左僉都御史巡撫甘肅卒

鄧以瓚

鄧以瓚新建人隆慶辛未進士第一選吉士歷官禮
部侍郎謚文潔瓚雖以文章冠冕海內屢起屢不赴
深坐西山者三十年不著書洞觀於天人之際不自
標門戶居或卽事賦言因人立教不數語耳前不緣
格套後不畱端倪于是支離聞諍鑿空之論無繇滋

澗雖囂然輕千駟然未嘗外人倫置民物爲偏枯隱
怪之譚有友問曰道何似曰難言再問之急曰知而
言未晚人絕不得窺其涯涘云

涂杰

涂杰新建縣人隆慶五年進士由龍游知縣選廣西
道御史陞光祿寺丞以東宮建言爲民

陳子貞

陳子貞字成之江西南昌人邑南岡田瀕湖歲潦民
苦逋稅多流亡慨然曰脫令某申眉宇當爲一方請
命久之舉鄉試成進士除溧水令溧水地卑受大江

秦淮水凡八十九所田率污萊貞以廩粟治隄至今
賴之會詔均田正疆界謹胥吏舞文而表異淳鹵規
度偃漕寬其征又以月奉市地瘞捐瘠於決訟有刑
無罰罰亦以粟平反諸大辟枉者若而人時時以禮
法要略勸善編祥刑鑑三書教督其邑邑大治有門
清如水邑治如家之謠徵拜御史條上六議復召對
之典行超遷之例核舉刺蠲帶徵設江南兵備禁

畱都囂訟閹孫暹矯

旨索舊逋連章數其罪已按

關西茶馬母喪哀毀如禮服闋除故宮薦曾公同亨
李公世達趙公用賢諸君子其于振綱紀開言路端

士習尤三致意焉已按閩首飭吏治責成監司以
及郡長吏時同事者耳目它寄舉刺頗失真貞不嫌
異同臺省率以爲確會代條上八事請革私奉孔廟
之褻海上開墾之宜裁租稅禁鐵冶清屯田通糴廣
南革武職科派均驛遞偏累閩人德之引疾歸歸亡
何起督南畿學政約言十二條簡而盡闡畢經解木
橫殺二生于水力爭正法請教職不受他直指綜核
又以師嚴而後道尊教官侍講必坐聽周中丞建文
德橋于金陵學宮之右後舉三大魁於形家似合適
橋圮貞易以石俾垂永永居七載三試十四郡所積

米廩贖錢數萬悉以養士擢太僕少卿去諸郡邑無
不祠祀之其蒞太僕遷通政會奉使 榮王邸納節
乞休初伯父爲家督私橐稍贏諸弟有微言曰吾曹
非伯氏寧有今日事之彌謹所受父產推與伯兄暨
弟而更爲斥餘畝繕廬舍婚嫁子女二十人許子姓
咸式化之庶幾昔江州之義門云建石牖於南岡田
捐奉入以倡而當路佐其不足里免逋亡其無言不
酬類此有撫閩之 命辭不獲會閩大水至卽發倉
以賑不繼請蠲解稅鹽課金六萬無令島夷乘間蹂
躪語極剴切上報可巡視諸要害始南澳迄澎湖千

里之內閱歷一週中山告急條上機宜七事重海道
擇海防勒汛兵稽名糧理屯田禁通倭均地利皆按
閩時所籌畫也水陸隊師集諸司大閱差次甲乙而
緩急用之請託不得一關其口久之以病瘁乞歸三
疏不得報而春汛期迫猶手書媿媿貽同事且囑其
子無以喪具煩有司亟籍郡縣贖鍰萬餘金還之公
帑沐浴整衣冠封識璽書符節焚香北望以拜昇之
藩司復誡其子木母過美母哭泣毋用鼓吹毋作佛
事毋久在邸婦女入侍輒屏去且曰死生之際大矣
吾於此故了然就榻正襟端坐其謀聞賜祭贈右

副都御史所至入名宦祠專祠在金陵三山門內

萬國欽

萬國欽號二愚新建縣人中萬曆癸未會試制義一
洗時弊力追古人授直隸婺源縣知縣克應天同考
已丑行取授山西道御史庚寅建言降劍州判官已
亥陞南刑部郎中未幾卒

涂宗濬

涂宗濬號鏡源南昌縣人中壬午鄉試癸未成進士
授浙江慈谿知縣丁憂復除蘄水調繁江陵復調黃
岡徵拜山東道御史巡按廣西河南山西順天等處

陞大理左寺丞歷延綏巡撫加陞副都御史兵部右
侍郎總督宣大山西尋陞右都御史兼兵部右侍郎
癸丑陞兵部尚書兼右副都御史甲寅加太子太保
陞兵部尚書乙卯回籍敷歷中外各有樹立生平篤
志講學海內推爲領袖非沾沾以功名顯者卒

劉曰寧

劉曰寧號員嶠江西南昌人萬曆己丑進士由編修
歷官詹事兼禮部右侍郎卒贈尚書曰寧爲文汪洋
自恣不拘拘于繩尺其人亦磊落不羣雖任詞林所
至各有樹立舉世共以大有爲期之未及柄用一